



Broj: 02-04-916/24-AP-3
Datum: 26.04.2024. godine

GRADSKO VIJEĆE ZAVIDOVIĆI
n/r PREDSEDAVAJUĆEM GRADSKOG VIJEĆA
Admir Fojnica, prof.

PREDMET: Odgovori na vijećnička pitanja sa 23. sjednice Gradskog vijeća Zavidovići održane 28.03.2024. godine, dostavljaju se

Povodom vijećničkih pitanja postavljenih na 23. sjednice Gradskog vijeća Zavidovići održanoj 28.03.2024. godine, dostavljamo odgovore na iste kako slijedi:

1. VIJEĆNIČKO PITANJE VIJEĆNIKA SAMIRA SKEJIĆA

Vijećnik Samir Skejić: Tražim od nadležne službe za upravu privrede, društvenih djelatnosti, pitanja boraca i opću upravu da nam predstavi:

- Statistiku i tačan broj porodica sa djecom, razvrstanim po porodicama sa jednim, dvoje i više djece kao i porodice bez djece.
- Statistiku i kretanje broja učenika u periodu od 2010. godine do 2023. godine razvrstanih po osnovnim i srednjim školama u našem gradu.

Odgovor na vijećničko pitanje: Službe za upravu društvenih djelatnosti, pitanja boraca i opću upravu nije dostavila odgovor na vijećničko pitanje.

2. VIJEĆNIČKO PITANJE VIJEĆNIKA FERIDA KAKNJAŠEVIĆA

Vijećnik Ferid Kaknjašević: Na osnovu člana 8 i 87 Poslovnika o radu Gradskog vijeća Zavidovići upućujem vijećničko pitanje naslovljeno na Službu za upravu privrede, lokalni razvoj, infrastrukturu i međunarodni razvoj u kojem tražim odgovor ko ima pravo i pod kojim uslovima postavljati ležeće policajce na lokalnim (seoskim i prigradskim) putevima.

Obrazloženje

Svjedoci smo da na pojedinim lokalnim putevima postoje ležeći policajci, vjerovatno postavljeni samoinicijativno i nestručno od lokalnog stanovništva.

Smatram da ovo pitanje treba urediti posebnom odlukom ili uredbom u cilju bolje sigurnosti u saobraćaju, ali i prevencije oštećenja i kvarova vlasnika motornih vozila.

Odgovor na vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-6-120/24 od 15.04.2024. godine): Na osnovu člana 60. Odluke o bezbjednosti i organizaciji saobraćaja na cestama općine Zavidovići („Službeni glasnik Općine Zavidovići“, broj: 3/2018) je propisana procedura postavljanja posebnih objekata na cesti. Pomenutom Odlukom u navedenom članu u

stavu (2), (3), (4) i (5) je propisano da za postavljanje posebnog objekta potrebno je da podnosilac zahtjeva za postavljanje posebnog objekta u svom zahtjevu, koji podnosi nadležnom organu, koji upravlja cestama, navede razloge i druge analitičke parametre, koji opravdavaju postavljanje posebnih objekata. O zahtjevu rješava upravitelj cesta općine Zavidovići za lokalne ceste, gradske ulice i ulice u naselju i nerazvrstane ceste općine Zavidovići, odnosno Ministarstva za prostorno uređenje, promet i komunikacije i zaštitu okoline ZDK, Direkcije za ceste ZDK za regionalne ceste. Ukoliko nadležni organ zahtjev riješi pozitivno radi na izradi posebnog projekta ili elaborata. Troškove izrade projekta odnosno elaborata kao i postavljanje posebnih objekata pada na teret upravitelja ceste.

Služba za upravu privrede, lokalni razvoj, infrastrukturu i međunarodnu saradnju u razmatranju i odlučivanju zahtjeva (stranke, pravnog lica itd.) izvrši pregled na licu mjesta te razmatra da li su ispunjeni uslovi predviđeni članom 2. Pravilnika o postavljanju posebnih objekata na cesti radi smanjenja brzine kretanja vozila („Službeni glasnik BiH“, broj: 6/06) gdje su navedena mjesta gdje se postavljaju posebni objekti. Posebni objekti na cesti radi smanjenja brzine kretanja vozila prema pomenutom pravilniku se postavljaju ispred pješačkih prijelaza, prijelaza biciklističkih staza / traka preko ceste, u blizini vrtića, škola i drugih lokacija na kojima često borave djeca, te u blizini mjesta kolektivnog boravka starijih osoba i osoba sa pojedinim funkcionalnim smetnjama - bolestima (osobe u invalidskim kolicima, rulatorima), u blizini lokacija gdje veći broj nezaštićenih učesnika u prometu prelazi cestu (pješaci, biciklisti i sl.), željezničkih prijelaza, cestarskih naplatnih prolaza, kao i u blizini ukrštanja cesta.

S obzirom da niste upotpunosti precizirali kategoriju ceste (lokalne ceste, nerazvrstane ceste i gradske ulice) pretpostavljamo da su u pitanju lokalne ceste, značajno je napomenuti da je prethodnom Općinskom Odlukom o bezbjednosti i organizaciji saobraćaja na cestama Općine Zavidovići („Službeni glasnik Općine Zavidovići“, broj: 3/2015) a koje je donijelo Općinsko vijeće Općine Zavidovići su propisana mjesta, tačne lokacije gdje postoji potreba postavljanja posebnih objekata na cesti, gdje su između ostalog navedene i lokacije na lokalnim cestama kao što je na lokalnoj cesti Zavidovići - Lovnica, Zavidovići - Gostović, Zavidovići - Pašin Konak itd.

3. VIJEĆNIČKO PITANJE VIJEĆNIKA ŠEMSUDINA SKEJIĆA

Vijećnik Šemsudin Skejić: Na osnovu člana 8. i člana 87. traćim odgovor na sljedeće Vijećničko pitanje:

Kada će nadležna služba za upravu privrede, lokalni razvoj, infrastrukturu i međunarodnu saradnju početi rješavati pitanje kanalizacije u prigradskom naseljenom mjestu u Ulici Jusufa Polića Ribara na dionici od mosta na putu Zavidovići-Žepče, uzvodno do mosta u Stipovićima.

Obrazloženje

Obilazeći lokaciju fekalne i oborinske kanalizacije u Ulici Jusufa Polića Ribara nije mi ostalo ništa sem da konstatujem kako je stanje alarmantno i nepodnošljivo za prolaznike, a pogotovo za mještane Naselja.

Moje pitanje je:

Kada će Služba za upravu privrede, lokalni razvoj, infrastrukturu i međunarodnu saradnju poduzeti korake koji će omogućiti početak izgradnje sistema fekalne i oborinske kanalizacije u Naselju koje se proteže između mosta na rijeci Gostović na putu Zavidovići- Žepče i mosta u Stipovićima.

Za početak molim da odmah uputite Komunalnog inspektora da pregleda lokaciju identifikuje razloge i predloži rješenje odnosno plan. Mora se pristupiti izradi projektne dokumentacije, a zatim i izvođenju radova.

Na terenu je uočljivo da se duž čitavog naselja nalazi više od jedan kilometar otvorenog toka fekalne kanalizacije. Sve to naravno ide u rijeku Gostović. To je dovoljan alarm i znak da moramo reagovati.

Smatram da i mještani moraju dati svoj doprinos kako bi realizacija otpočela čim prije.

Odgovor na vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-6-120/24 od 15.04.2024. godine): Ucjeljenje otvorenih kanala u ulici „Jusufa Polića Ribara“ je u nadležnosti Kantonalne direkcije za ceste jer ista čini dio regionalne ceste Zavidovići – Kamenica – Ponjeri - Kakanj.

Članom 13. Zakona o cestama FBiH („Službene novine FBiH“, broj: 12/2010, 16/2010 i 66/2013) određeno je da upravljanje, građenje, rekonstrukciju, održavanje i zaštitu regionalnih cesta vrše javne kantonalne ustanove za ceste.

Takođe članom 32. istog Zakona definisano je sljedeće:

„Nadležni općinski, odnosno gradski organi mogu tražiti da se magistralna ili regionalna cesta koja prolazi kroz naselje ili grad izgradi ili rekonstruiše sa elementima koji utiču na povećanje troškova gradnje u odnosu na cestu izvan naselja kao što su veća širina kolovoza, gradnja trotoara, prostora za parkiranje vozila, izrada rasvjete i prilagođavanje putnih objekata posebnim potrebama.

Povećane troškova gradnje ili rekonstrukcije cesta prouzrokovanih zahtjevom iz stava (1) ovog člana snosi podnosilac zahtjeva u visini sredstava u skladu sa ugovorom o sufinansiranju.

Učestvovanje u finansiranju radova iz stava (1) ovog člana, kao i drugi odnosi sa upraviteljem ceste u vezi sa gradnjom i rekonstrukcijom, reguliraju se ugovorom sa nadležnim općinskim, odnosno gradskim organom.“

Dakle, imajući u vidu navedene članove zakona Grad Zavidovići ne može provoditi projekte ove vrste, već može samo učestvovati u finansiranju / sufinansiranju istih, dok nosilac posla mora biti Kantonalna direkcija za ceste.

4. VIJEĆNIČKO PITANJE VIJEĆNIKA AMERA AVDIČEVIĆA

1. Vijećnik Amer Avdičević: Na osnovu člana 8. i 87. Poslovnika o radu Gradskog vijeća Zavidovići postavljam sljedeće pitanje:

Da li Grad Zavidovići ima bilo kakvu strategiju ili smjernice za poticanje novih radnih mjesta u budućnosti, kao i za privlačenje stranih i domaćih investitora koji imaju kapacitet otvaranja novih proizvodnih pogona.

Odgovor na vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03- 45-6-120/24 od 15.04.2024. godine): Grad Zavidovići nema sektorske strategije koje zasebno tretiraju poticaje i privlačenje investitora, ali ima Strategiju integriranog razvoja (trenutno u fazi revizije) koja pruža holistički pristup, nudeći dugoročne i sveobuhvatne koristi koje nadmašuju one koje se mogu postići kroz pojedinačne sektorske strategije poticaja ili privlačenja investitora. Strategija integriranog razvoja obuhvaća sve aspekte ekonomskog, socijalnog, i ekološkog razvoja. Umjesto da se fokusira samo na privlačenje investicija ili pružanje poticaja određenim sektorima, ova strategija uzima u obzir širi kontekst razvoja društva, čime osigurava ravnotežu i harmoniju u razvoju.

Pored navedenog i Zakon o razvoju i razvojnom planiranju u FBiH propisuje potrebu za koordinacijom i integracijom različitih sektorskih politika kako bi se postigli opći razvojni ciljevi. Jedno integrirana strategija omogućava da se ciljevi i aktivnosti različitih sektora usklade i povežu radi postizanja sinergijskih učinaka. To osigurava konzistentan pristup razvoju koji adresira različite aspekte života i potrebe stanovništva na sveobuhvatan način, umjesto da se sektorski fokusira samo na određene segmente društva.

Također, postoje i druge prednosti koje govore u prilog izrade jedne, integrirane strategije u korist više sektorskih strategija:

Sinhronizacija ciljeva: Strategija integriranog razvoja objedinjuje ciljeve poticaja i privlačenja investitora. Umjesto da se fokusiramo na izolirane metode, strategija integriranog razvoja usklađuje interese svih relevantnih dionika, uključujući vladu, investitore, lokalno stanovništvo i industrijske sektore.

Optimizacija resursa: Eliminacija potrebe za različitim strategijama omogućava bolje korištenje resursa. Umjesto trošenja vremena, novca i truda na izradu i provedbu više strategija, resursi se usmjeravaju na jedinstvenu strategiju integriranog razvoja koja će efikasnije ispuniti potrebe zajednice.

Diversifikacija ekonomije: Umjesto da se oslanja na pojedinačne investitore ili sektore, integrirana strategija potiče diversifikaciju ekonomije. To smanjuje rizik od naglih promjena u tržištima i ekonomskim trendovima, te osigurava stabilnost i otpornost ekonomije na promjene.

Poticanje lokalnog poduzetništva: Integrirana strategija stavlja veći naglasak na poticanje lokalnih poduzetnika i malih i srednjih poduzeća, što proizvodi pozitivan učinak na lokalnu ekonomiju, stvaranje radnih mjesta i ravnomjernu raspodjelu bogatstva.

Smanjenje administrativnog opterećenja: Razvoj i primjena više strategija zahtijeva složeniju administraciju i nadzor. Kombiniranje poticaja i privlačenja investitora u jednu strategiju smanjuje administrativno opterećenje, olakšavajući provedbu i praćenje napretka.

Stvaranje održivijeg razvoja: Integrirani pristup razvoju promovira održivost na više nivoa. Umjesto kratkoročnog fokusa na privlačenje investitora ili trenutne poticaje, strategija integriranog razvoja usmjerava pažnju na dugoročne ekonomske, socijalne i ekološke ciljeve, što rezultira stabilnijim i održivijim napretkom.

Smanjenje rizika: Različite strategije mogu nositi sa sobom različite rizike. Integrirani pristup pomaže u smanjenju rizika diversifikacijom izvora prihoda, oslanjajući se na širi spektar industrija ili sektora. Na taj način, ako jedan sektor doživi pad ili krizu, ostali sektori mogu pružiti određenu stabilnost. Osim toga, usklađivanje ciljeva svih relevantnih dionika smanjuje političke, socijalne i ekonomske rizike povezane s razvojem.

Povećanje transparentnosti i odgovornosti: Kombiniranje različitih strategija u jednu integriranu strategiju poboljšava transparentnost i odgovornost u procesu razvoja. Jasnije definirani ciljevi i mjere napretka olakšavaju praćenje rezultata i ocjenjivanje učinkovitosti politika, što povećava povjerenje dionika u proces donošenja odluka.

Olakšavanje donošenja odluka: Jedinstvena strategija integriranog razvoja olakšava proces donošenja odluka jer eliminira potrebu za usklađivanjem i kompromisima između različitih strategija i interesa. To ubrzava provođenje projekata i inicijativa, te smanjuje birokratske prepreke.

Pored navedenog bitno je istaknuti i da je visina poticaja, na godišnjem nivou cca. 100.000 – 150.000 KM, te je upitno koliko su ti iznosi konkurentni u poređenju sa drugim lokalnim ili regionalnim jedinicama te jesu li dovoljni da privuku značajne investitore ili potaknu stvaranje značajnog broja novih radnih mjesta.

Nastojeći prevažići finansijska ograničenja Grad Zavidovići je svake godine uključen u nekoliko projekata koji doprinose ciljevima utvrđenim Strategijom, a kroz mjere poticaja i mentoringa startupa. Projekti u koje je Grad Zavidovići trenutno uključen su: „Lokalni

ekonomski razvoj u BiH“, kojeg sufinansira Caritas Švicarske, „Inkubator poslovnih ideja“, kojeg sufinansira Fondacija Imapakt, „Diaspora Invest“, kojeg sufinansira USAID, „Tehnička pomoć jedinicama lokalne samouprave“ USAID i „Udruživanje snaga za radna mjesta i stabilnost: Podrška ugroženim osobama u BiH kroz javno / privatno / civilno partnerstvo“ kojeg sufinansira LIRcd.

Na kraju, ali ne manje važno, zasnovano na strateškim ciljevima i opredjeljenjima definiranim Strategijom, te poštujući principe participativnog planiranja i donošenja odluka, nadležna služba svake godine sačinjava Program poticaja, koji se usaglašava sa Privrednim savjetom Grada Zavidovići, a nakon formiranja Savjetodavnog odbora građana sredinom 2023. godine, isti će se razmatrati i na ovim sjednicama. Na Privrednom savjetu se, također, svake godine razmatra Izvještaj o realizaciji poticaja, za prethodnu godinu.

2. Vijećnik Amer Avdičević: Na osnovu člana 8. i 87. Poslovnika o radu Gradskog vijeća Zavidovići postavljam sljedeće pitanje:

Molim da mi Službe dostave tabelarni prikaz svih potpisanih Ugovora sa firmom "Delta-H" d.o.o Zavidovići i firmom "Elektro Blitz" d.o.o Zavidovići u posljednjih osam godina. U tabelarnom prikazu navesti Ugovore potpisane na osnovu prethodno raspisanih poziva za javne nabavke, kao i Ugovore potpisane na osnovu direktnih sporazuma sa pomenutim firmama, sa tačno naznačenim cijenama iz Ugovora.

Odgovor na drugo vijećničko pitanje (Odgovor je sačinjen na osnovu akta Službe za upravu finansija, budžet i trezor, broj: 05-45-8/24-AP-9 od 11.04.2024. godine): Postupke dodjele ugovora o javnoj nabavci radova, roba i usluga u periodu 05.04.2016. godine do 01.06.2021. godine provodile su službe za upravu i posebne službe Grada Zavidovići svakao u okviru svoje nadležnosti. Služba za upravu finansija, budžet i trezor Grada Zavidovića (Stručna služba gradonačelnika u periodu 01.06.2021. godine do 01.01.2022) provodi postupke javne nabavke od dana stupanja na snagu Pravilnika o internim procedurama u postupku nabavki roba, usluga i radova i direktnom sporazumu („Službeni glasnik Grada Zavidovići“, broj: 1/22 i 6/23).

Također, nakon 01.06.2021. godine postupak javnih nabavki je centralizovan te je propisano da službe za upravu i posebne službe Grada Zavidovići i Gradsko pravobranilaštvo Zavidovići svaki novi postupak javne nabavke predviđen Planom javnih nabavki Grada Zavidovići za tekuću godinu, realizovat će na način da zahtjev za nabavku podnose Gradonačelniku na obrascu zahtjeva za nabavku iz aneksa „A“ Pravilnika. Nakon provođenja izrade potrebne dokumentacije, objave, ocjene i odabira najpovoljnije ponude, nakon zaključivanja ugovora o javnoj nabavci, potrebna dokumentacija i ugovor dostavlja se nadležnoj službi na praćenje i realizaciju ugovora.

Posebno napominjemo, da se postupci javnih nabavki provode u skladu sa Zakonom o javnim nabavkama („Službeni glasnik BiH“, broj: 39/14 i 59/22) te da se svi podaci odnosno odluke o izboru napovoljnijeg ponuđača, odluke o poništenju ili otkazivanju javne nabavke, kao i godišnji izvještaj o zaključenim ugovorima sa ponuđačima objavljivali i mogu se naći na web stranici ugovornog organa, istovremeno sa upućivanjem ponuđačima koji su učestvovali u postupku javne nabavke, u skladu sa članom 70. stav (6) Zakona.

Stupanjem na snagu izmjenama Zakona o javnim nabavkama objavljen u „Službenom glasniku BiH“, broj: 59/22 dana, 02.09.2022. godine i koji je stupio na snagu osmog dana od dana objavljivanja u „Službenom glasniku BiH“, a čija je primjena počela u decembru 2022. godine, Grad Zavidovići najkasnije u roku od 30 dana od dana zaključenja ugovora odnosno nastale izmjene objavljuje osnovne elemente ugovora (vrijednost, period trajanja, rok izvršenja, rok plaćanja, garantni period itd.) za sve postupke javne nabavke, kao i sve izmjene ugovora do kojih dođe u toku realizacije ugovora na portalu javnih nabavki. Portal javnih nabavki je informacioni sistem koji omogućava elektronsku komunikaciju, objavljivanje dokumenata i

spvođenje postupaka javne nabavke elektronskim putem, što znači da se na portalu javnih nabavki mogu vidjeti svi podaci od pokretanja postupka javnih nabavki do zaključivanja odnosno dodjele ugovora ponuđačima.

Potencijalni ponuđači i zainteresovana lica, kao i građani (kao i vijećnici) mogu da pretražuju ugovorne organe i postupke javnih nabavki u baneru Pretraga gdje se mogu pretraživati i pregledati svi oglasi objavljeni po Zakonu o javnim nabavkama. Korištenje, odnosno, pretraga Portala je besplatna, ne zahtjeva nikakvu registraciju i anonimna je.

3. Vijećnik Amer Avdičević: Na osnovu člana 8. i 87. Poslovnika o radu Gradskog vijeća Zavidovići postavljam sljedeće pitanje:

Molim da mi Službe dostave svu dokumentaciju vezanu za dodjelu parkirališta na korištenje radi pružanja usluga parking uz naplatu. Tražimo da nam se dostave svi do sada zaključeni Ugovori sa privrednim društvima zajedno sa visinama naknade koju plaćaju privredna društva po svakom zaključenom Ugovoru. Tražim da mi se dostavi i Odluka vijeća koja je osnov za raspisivanje javnih poziva za dodjelu parkirališta na korištenje radi pružanja usluga parkinga.

Odgovor na vijećničko pitanje: Zbog potrebe više vremena za pripremu odgovora na ovo vijećničko pitanje (Naročito za dostavu ugovora o dodjeli parkirališta na korištenje koji su zaključeni u ranijem periodu i koji su prestali da važe) zbog njihovog preuzimanja iz arhivskog depoa, odgovor na ovo vijećničko pitanje dostavit ćemo na sljedeću sjednici Gradskog vijeća Zavidovići.

5. VIJEĆNIČKO PITANJE VIJEĆNIKA HAKIJA OSMIĆA

Vijećnik Hakija Osmić: Imam jedno kratko pitanje, prošle godine sam u septembru isto pitanje postavljao.

Šta je sa početkom izvođenja asfaltnih radova na kategorisanju puta u mjesnoj zajednici Brezik znači preko mosta lijevo prema Lugu, Memići na zaseoku Brezik-Staro selo?

Znam da su mještani ovog područja značajna sredstva uplatili čini mi se na račun budžeta grada Zavidovići, da sam prošle godine u septembru dobio odgovor da je tender u toku i da će radovi vrlo brzo početi sa radom, evo došao je i april naredne godine, radovi još uvijek nisu krenuli. Tražim pismeni odgovor kada se očekuje početak tih radova.

Odgovor na drugo vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-6-120/24 od 15.04.2024. godine): Očekujemo da će se realizacija ovog ugovora izvršiti u mjesecu aprilu 2024. godine.

Ovdje napominjemo da je Grad Zavidovići proveo postupak dodjele ugovora o javnoj nabavci radova na asfaltiranju cesta u MZ „Brezik“ u vrijednosti od 57.330,00 KM od čega je sufinansiranje građana MZ „Brezik“ 20.000,00 KM.

S poštovanjem

Dostavljeno:

GRADONAČELNIK

1. Naslovu,
2. U spis.

doc. dr. Hašim Mujanović

Obradio: _____
(Nermin Čahtarević)